

SANTEZ BARBA BENIGUET,  
INTERCEDIT EVIDOMP, NI HO PED.

## HISTOR EUS A VUEZ

### SANTEZ BARBA,

*Pehini zo mad da veza reclamet dioc'h  
ar gurun ha dioc'h ar maro subit.*

---

Var an ton ordinal.

**M**E ho suppli, compagnenez,  
Da zelaou cana ar Vuez  
Da zantez Barba biniguet,  
A zo a nevez composet.

Er bloa daou e'hant hac anter-cant,  
Dindan Maximin an tyrant,

Demeus a noblanç bras meurbet,  
E Nicomedi voe ganet.

---

He zud a voa idolatret  
A gorf, a galon, a speret;  
He zad d'ar gristenien garo,  
A rê o laçat d'ar maro.

---

Mes ar Verc'hez Santez Barba  
Nemet Jesus ne gar netra;  
Christenez voa evit certen,  
Ha souten vras d'ar gristenien.

---

Oc'h e beza caer meurbet,  
Gant eur prinç bras voe goulennet,  
Hac a voa gantâ deziret  
Evit e c'haouet da bried.

---

He zad a gomlandas dezi  
Accepti soudan ar parti;  
Mes hi a respontas neuze  
Ne raje biqen an dra-ze.

O sònjai galloud he dompti,  
Gourc'hemen a eure dezi  
Antren en eun tour er prison,  
O clasq he renji d'e rêson.

Eno e cavas Doue e zad  
A ranversas gant eun tel troad :  
Da Jesus-Christ en em roas  
Corf hac ene a galon vad.

Ar c'homzou-màn a lavaras :  
Jesus a zo maro er groas,  
Voui a ràn d'ho Majeste  
A galon va virginite.

Neuze souden dre viracl bras,  
Sin ar Groas qen don a c'hravas  
Gant e bis en eur men calet,  
E effaci ne allet qet.

Goude-ze e commandas prest

Ma vize great tri brennest  
Evit enori an Drindet  
A gare a galon barfet.

---

He zad an dra-ze pa velas,  
Ouz ar Zantez a c'houlennas :  
Petra sinifi qementse  
Zo grêt dre hoc'h autorite?

---

Evit enori an Drindet  
O ober am eus commandet :  
An Tad, ar Mab, ar Speret-Glan  
A zo tri ferson en unan.

---

Tri brennest zo var ar prison ;  
Un Doue zo en tri ferson ;  
Mes va entent na ellit qet,  
En defot beza badezet.

---

Va zad, pa em eus commancet,  
E livirin dêc'h eur secret ;  
Credi a ràn en Jesus-Christ ;

Ha droug a ràn , ma zoc'h-hu trist ?

—

Souezet omp ouz ho quëlet  
Entrezoc'h , c'houi , idolatret ,  
Ouz ho quëlet oc'h adori  
Doueou grêt gant mein ha pri.

—

Me ne ràn qet a estim bras  
A Jupiter nac a Ballas ;  
Satan en deus o invantet  
Evit coll ar bobl eus ar bed.

—

Eur re zo Egyptianet ,  
Hac a ador ar serpantet ,  
Ispicial ar c'hrocodil ,  
A zo var dro rivier an Nil.

—

Darn all a ador un eujen ,  
Eur seurt all a bed un azen ,  
Hac an dud a Alexandri  
A ador ar c'haz hac ar c'hi.

—

Etrezomp-ni oll , Christenien ,

A ador un Doue mui qen ,  
Pehini a zo an Autrou  
Eus an douar hac an ênvou.

---

Ho pet , balamour da Zoue ,  
Ho pet truez ouz oc'h ene ;  
Lest al lezen-ze milliguet ,  
Petramant e viot daonet.

---

He zad neuze pa e c'hlêvas ,  
Dre goler vras e respontas :  
Effrontet out , en assuranc ,  
Comz er fêçon-ze em presanç.

---

Ia , ret eo , assuramant ,  
E pez-te collet da sqiant ,  
Adori un den zo crouguet  
Evit crimou hep mar ebet.

---

Va zad , laqêt voa d'ar maro  
Gant ar judevien en e vro ;  
Mes , va zad , ne ententit qet ,

Penevert se e voamp collet.

---

Da ennes en deus va frenet ,  
Va zad , ez on-me demezet ;  
Brassoc'h mestr eo assuramant  
Eguet Maximin an tyrant.

---

Ennes en deus grêt a netra  
Qement a velomp er bed-mâ ,  
Hac a rei eur plaç da repos  
D'ar Gristenien er Barados.

---

Mes ar re ne gredint enna ,  
Pa zeuyo da varn ar bed-mâ ,  
O c'hondaono d'an tan grissas ;  
N'en deus poan a ve qen divlas.

---

En eur goler ec'h antreas ,  
E gleze diouc'h-tu a dennas ;  
He zreuzi fellas dezàn ,  
Mes Doue a viras outàn.

Redec a eure var he lerc'h ,  
Mes eur roc'h güen evel an erc'h  
Evit he c'honservi antier  
En em digoras dre'n anter.

Goude-ze e voe qemeret ,  
Ha gant qerden rust amaret ,  
Ha d'ar presidant Marcian  
E zad el livras e-unan.

Ar presidant , pa e güelas ,  
Ouc'h ar Zantez a c'houlennas :  
Din-me prontamant livirit  
Peseurt Doue a adorit.

Credit-hu certen , Presidant ,  
Christenes oun certenamant ;  
Ha ne zeus nac aour na tourmant  
A elfe chench va zantimant.

Ho toueou zo hep gallout



Na da ober na mad na droug ;  
Rac-se e zeo bras ho fazi  
Laqat ar bobl d'o adori.

---

Soùezet bras oun-me ganeoc'h ,  
Va merc'h , truez am eus ouzoc'h ;  
Qüittait ho lezen afo ,  
Pe autramant ez oc'h maro.

---

Mar qirit chench a zantimant ,  
Me royo dêc'h aour hac arc'hant ,  
Hac eur Prinç bras evit pried ,  
Ho caro a galon barfet.

---

It gante en perdition ,  
Jesus eo va zenzor güirion ;  
Bras ve an den ambitius ,  
Ma na ve contant a Jesus.

---

E zad neuze , pa he c'hlêvas ,  
D'ar Presidant a lavaras :  
Autrou Presidant , grit justic ,

Rac homàn zo leun a valiç.

—

Rac-se grit justiç , me ho ped ,  
Ha dezi ne faziet qet ,  
Pe me scrifo a dra certen  
Ez oc'h evit ar Gristenien.

—

An Impalaer dre e arrêt  
A ordren ma vezo losqet ;  
Mar faziit , credit ervat  
Ez oc'h assur da goll ho stat.

—

Neuze souden voe divisqet ,  
Ous eur pillyer e voe staguët ,  
Ha dispennet gant scrifellou ,  
Ma coeze he c'hic a beziou.

—

Un horrol bras e voa guëlet  
He goad virginal o redeç ,  
Ha ne voa den , bras na bian ,  
N'e voeljont oll guitibunan.

Goude d'ar prison voe casset ,  
Er bassefos e voe laqet ,  
O clasq dont a ben anezi ,  
Autramant e disesperi.

Neuze souden voe bisitet  
Gant Jesus-Christ , Salver ar bed ,  
Pehini , en eur douch outi ,  
A eure salo anezi.

Barba , va merc'h , ho pet courac!  
Rac ar Presidant a arrach  
Ouzoc'h , en defot va c'huittât  
Da adori Doue ho tad.

Jesus n'am abandonit qet ;  
Mar plich ganêc'h va zicouret ,  
Ma ellin souten constamant  
Evit ho cloar pep seurt tourmant.

An eol , al loar hac ar stered

A ve qent mil güech distrujet  
Hepqen ma fazien deoc'h  
Ha n'am be sourci ac'hanoc'h.

—  
An eil ternos e voe tennet  
Evit beza interrojet,  
Hac e voe roet dei da choas  
Renonç, pe souffr tourmanchou bras.

—  
Ili, fortifiet gant Doue,  
Prest a respontas d'ar Roue :  
Lavaret em meus dêc'h dija  
Va zantimant, hep nac'h netra.

—  
Birviqen james ne chenchàn  
Ar pez a lavarin bremàn :  
Va Jesus a zo em c'halon,  
E varo hac e bassion.

—  
Hac a vezo da virviqen  
Evit nep glac'har, nep anqen ;  
Rac-se, tyrant, depech afo,

Deus d'am c'hondaoni.

---

An tyrant-ze gant e arrach  
A laqas dispen e bisach  
Hac ar c'hig divar e c'hostou ,  
Gant cribou houarn ha scifellou.

---

Gant goulouennou alumet  
E gouliou a voe rostet ,  
Hac e diou vron a unanou  
Distaguet gant razouerou.

---

Tennet voe neuze en noaz beo ,  
Goloet hepquen gant e bleo ,  
Gant eur goabren güen meurbet  
E goloas Salver ar bed.

---

Var e fenn an toliou morzol  
A scòe gant qer bras horol ,  
Ma grene memes ar pave  
Gant an toliou a receve.

Pa veljont n'allent qet outi ,  
O deus sònjèt e c'hondaoni  
D'ar fin da veza dibennet  
Var eur chaffot a voe dresset.

Ar bourreo gant truez outi  
Ne zibenne qet anezi ;  
E zad , bourreo ar c'hruella ,  
En em offras d'e dibenna.

Neuze ec'h eure eur beden  
Da Zoue vit ar Gristenien ,  
Ma pliche da Zalver ar bed  
Accordi dezi eur reqet.

Goulen a eure ouz Doue  
Evit piou benac m'e fedje  
Ne varvo qet subitamant  
Abars receo ar Zacramant.

Un Æl neuze apparissas ,

Ha d'ar Zantez a lavaras :  
Barba , n'ho ped douetanç ebet ,  
Accordet eo d'êc'h ho reget.

---

Eur gurunen a c'hloar a zougàn  
Bremâ-souden d'ho curunàn ,  
Rac prest oc'h da vont da velet  
Doue , ar Zent ha Sentezet.

---

Eun tol cleze digant e zad  
A zispartias evit mad  
E c'horf eürus diouz e fen ,  
Hac e lamas a bep anqen.

---

Eun tol curun demeus an eê  
A foueltras e zad goude ze ;  
Qement all evit paeamant  
A c'hoarvezas gant an tyrant.

---

Ebars en calz eus a vroyou  
Eus dediet dei Chapelou ;  
Mes unan zo dreist pepini

A interest ac'hanomp-ni.

An drede deiz a viz Gouere  
E ve bras ar solanite  
E Santez Barba, en Rosco;  
Eno e ve tud a bep bro.

Pedomp-hi eta, Bretonet,  
Ma vimp dre e graç preservet.  
Demeus ar gurun hac an tân,  
Ha da savetât peb-unan.

FIN.



---

E Montroulez, eus a Imprimeri LÉDAN.